

EEC yaahidi kuipatia

U. Msumbiji chakula ^{29/4} 988

MAPUTO, Msumbiji

p. 2

JUMUIA ya Uchumi ya Ulaya Magharibi (EEC) juzi iliahidi kuipatia Msumbiji tani 127,000 za msaada wa chakula ikiwa ni kuitikia mwito wa Umoja wa Mataifa wa kutaka Msumbiji isaidiwe kwa mwaka 1988/89.

Ahadi hiyo imo katika salamu kutoa kwa Makamu wa Rais wa jumuiya hiyo, Bw. Lourenco Natali, iliyosomwa mjini hapa katika siku ya pili ya mkutano unaozungumzia misaada ya dharura kwa Msumbiji, ambao unagharimiwa na Umoja wa Mataifa.

Salamu hizo, ambazo zilisomwa na wakilishi wa EEC nchini Msumbiji,

zilisema jumuiya hiyo imeamua kuipa Msumbiji tani 110,000 za nafaka kwa mwaka 1988.

Jumuiya hiyo pia itatoa tani 4,000 za maharage, tani 2,000 za mafuta ya kupikia na tani 1,000 za sukari, vyote vya thamani ya sh. milioni 2,820.

EEC pia itaipa Msumbiji tani 10,000 kupitia mashirika yasiyokuwa ya serikali, na ruzuku ya sh. milioni 337.4 itatolewa kupitia mashirika kama hayo na zitatumika kwa ajili ya mipango ya misaada ya dharura.

Bw. Natali alisema Msumbiji inabidi ipewe misaada zaidi kwa sababu "ingawa tayari inakabiliwa na hali mbaya ya uchumi kutokana na hali ya hewa isiyoridhisha, pia inaendelea kukabiliwa na mashambulio yanayotambwa na vikundi vinavyosaidiwa na mataifa ya nje."

Akihutubia kikao cha ufunguzi cha mkutano huo Jumanne iliyopita, Rais Joaquim Chissano wa Msumbiji aliushutumu utawala wa Makaburu wa Afrika Kusini kwa kusababisha matatizo yanayoikabili nchi hiyo ambayo yamefanya wananchi wa Msumbiji wapatao milioni 5.9 wahitaji misaada ya chakula.

Habari zinasema Shirika la Mpango wa Chakula la Umoja wa Mataifa linatarajia kutenga tani 35,000 za chakula kwa ajili ya Msumbiji katika msimu wa kilimo wa 1988/89.